

IPARIACANARIGUETI PAAVORO ITIONCAJIAQUENERI TESARONICAQUITICA

Antsatantaquemparoca

Ocatica iroguenti antsatantaquemparoca iroquetica paperi itioncacaantaqueca Paavoro itioncajiaquenerigueti tsaroventajiacarica Jesoshi choocajianquitsica gunteninintsiqui pajitatsica Tesaronica. Irocashi itioncacotaqueri irira Paavoro otsipaqui paperiqui (Ya. 7.57-8.1; 9.1-31; 13.1-28.31), aisa itioncacotaqueri ichoocaquegueti Paavoro Tesaronicaqui paperiqui Yantajiguica 17.1-10; 20.1-5. Itioncacaantiquerero Paavoro ocatica paperi tequeratagueti intioncacaanteroji maasano otsipapae paperipae itioncacaantaqueca choocajianquitsica paperiqui icantajitica *Tsave-tacoquerica Jeso quirishito*. Itioncacaantiquerero ocatica paperi irooca ajagantsiniqui 50, irooca 51, iquenaguetanajigueti mavitetapojsica itsavetacovaequerigueti Quirishito.

Timoteo icamantaqueri Paavoro quero icojiacani tsaroventajiacarica Tesaronicaqui, cotanquitsi tee iragavejeji Paavoro irogueji iramenajiaqueri, irootaquequea intioncacaantantajiacanarica ocatica paperi (2.17-3.6). Icamantajiaqueri iraventamajajiaquempari Quirishito intampishitacaajiaqueriniji, aatoquea yovashiantajigurotsi yaventajiacarigueti, irantajiaqueroquea inintacaajiaquerica Jesoshi

(1.2-10; 3.7-9). Icamantajiaqueri quero incojiaquempani irinetsanajiaqueroniji inintacaajiaquerica Aapani Irioshi (4.1-12; 5.5-22), tee inchoocateji tsatanquitsineca quero oncarateni incoraquetantajatempaca Quirishito acaniqui quepatsiqui aisa intancorejantajianajempaca quemisantajiaquerica (4.13-5.11). Paavoro iquenquejacaajiaqueri Tesaronicaquitica quero icotaca iriatimpa ichoocatimojiaquerigueti, aatoniji iquemisantajiguiri tsojeventajiacarica Paavoro (2.1-12).

¹ Imaica naatimpaquea Paavoro notsipatacari Shirivano aisa Timoteo, notioncajiaquempiquea maasano aviatimpajia choocajatiacsca oraniqui Tesaronicaqui tsaroventajigarica Aapani Irioshi aisa Amajirote Jesoquirishito. Namanacoventajiaquempiquea incavintsajajiaquempinijite Aapani Irioshi aisa Amajirote Jesoquirishito, inchoocatacaajiaquempinijite cameetsa aatonijite pishoshoguiteventajigaro taaca opajitapae.

Irirajia Tesaronicaquitica iquemisantamajaji-aqueroquea Quenquetsatsarentsi Oganejencatasica

² Nocantacoguitaniquea namanaguitirini Aapani Irioshi nocantajiaqueriquea noshinejiaca namenajiaquempigueti pitsaroventamajatanacariequa Amajirote Jesoquirishito.

³ Aisa namanajiaquerigueti nocantacoguitaniquea noquenquejajajiaqueroquea pisavicaventamajatanaquero maasanopae inintaguetic ariatimpa, iriotaquetari paventajiacaca. Picocani

pantamajajiaqueneriquea, pipintsajiacaritarite. Aisa patsipetacojianaca maasanopae, irooriji poguijajiaqueri incoraquetajategueti Amajirote Jesoquirishito oncoramanitapoajegueti.

⁴ Napitsaroventarijate, ipintsamajajiaquempiquea Aapani Irioshi, aisa notsajiaquequea icoguijajiaquempi.

⁵ Oraquea notsavetantimojiaquempigueti notsatacayaquempiroquea Quenquet-satsarentsi Oganejencatatsica, teequea nonquenquetsatacaashijiguempiquea intati, iriguentiquea agavejacaquaenaquea Ishire Aapani Irioshi. Aisa notsamajajiaquequea oraquea Quenquetsatsarentsi notsavetanti-mojiaquempica iroomajaca. Aviatimpajia pamenamajajiaquenaquea queroquea nocojiacani nochoocatimojiaquitimpigueti. Noquejetacaajiacaroquea imaica cameetsanijite pintsamajatimentajiaquenijite.

⁶ Iroompaquea pamenamajajiaquenagueti piquejelianacaquea aviatimpajia, piqueje-jianaquenaquea naatimpa, aisa piquempe-jianacariea Amajirote. Patsipevaeljiaquea cotanquitsiquea pishineventamajajiacaroquea notsavetantimojiaquempica, iriguenti oguishinejaquempi Ishire Aapani Irioshi.

⁷ Jeroquea irooquea iquemacojiaquempigueti maasano tsaroventajigarica Maseroniaquitica aisa Acayaquitica iquempejianaquempiquea aviatimpajia.

⁸ Cotanquitsiquea teetarite aparoquea inquemacojiteroji Quenquetsatsarentsi Oganejencatatsica Maseroniaquitica aisa

Acayaquitica, iquemacojiavaqueroquea aisa osamanipaequitica, otsitacaguitejavaetanacaroquea. Aisa iquemacojiaquempi maasano pitsaroventamajatanacariequa Aapani Irioshi. Teequea noncamantajajeriji naatimpajia,

⁹ itsavetacojiaquempitari maasano, iquenquetsatacojiaquempi querocaca picojiacani pishineventamajatacarogueti notsavetantimojiaquitimpigueti coramaniqui narejerejeitaquitagueti namenajiaquitimpigueti, ariquea pipishoncajianaqueriquea pipeaguevetacaca pirioshigueta intati iriotaquequea pitsaroventamajajanaja Irioshimajaca teeca irimetojimateji.

¹⁰ Aisa iquenquetsatacojiaquempiquea icanta-jaque picocaniquea poguijajiaqueri incoraqueta-jategueti Jesoshi Irijanite Aapani Irioshi ivochata-jica, iriotaquequea meshiajiacajica aatonijite icat-simajajiquea Aapani Irioshi oncoramanitapoja-jegueti.

2

Queroquea icocani Paavoro ichoocaquegueti Tesaronicaqui

¹ Imaicaquea, napitsaroventarijate, pitsajiaquequea coramaniquea narejerejeitaquitagueti namenajiaquitimpigueti teetarite noanoaitashitempaji intati.

² Pitsajiaquequea ontaniquiquea ontaniqui Piriponiqui, icantacantaivaequenaquea yatsipetacaajiaquena, cotanquitsiquea nocoraquejiaquegueti aviatimpajiaqui

itampishitacajaiaquea Aapani Irioshi noquenquetsatimojiapojaquempiquea notsat-acajaiapojaquempirotarite Quenquetsatsarentsi Oganejencatatsica. Ichooocajiavecaquea oshequini catsimajiaquenaca, cotanquitsiquea naatimpajia teequea nontsaroajigueji.

³ Manatarite notsavetacovintsajianaqueroquea Quenquetsatsarentsimajaca, teequea noncantashitatiguemparoji. Teetarite nonquen-quejajiajeroji taampaquea naantajiajemparo naatimpajia, aisa teequea namatavijantajigueji.

⁴ Inintacaajiaquenatari Aapani Irioshi nontsavetacojiaqueroquea Quenquetsatsarentsi Oganejencatatsica. Ariquea noquejejiguiroquea imaica notsavetantavaetigueti. Teetarite irioquea nonintajigue noshinetacaajiaquempari caquinte, iriguentiquea nonintajiaquequea noshinetacaajiaquempa Aapani Irioshi amenamajajiacajica querocaquea acojiacani ashirequi.

⁵ Pitsajiaquequea aviatimpajia noquenquet-satacaaajiaquempigueti teequea noshinetacaamampejaiguempiji intati, aisa teetarite noshoshoventemparoji pivegarajiaquenanijite pimentaquitsitequi. Yamenajiaquenaquea Aapani Irioshi arimajaca nocantajiaquempica.

⁶ Naatimpajia teequea nonintimateji inquejetacaajitaquenaquea quempeca naatimpajiaca majirontajiatsica, tee nonintajigueji pinquejetacaajiaquena aviatimpajia, aisa tee nonintajigueji inquejetacaajiaquena itsipajia. Nagavejajiavecaquea nomperajiaquempime, naroguentijiatari itigarancanejia Quirishito, cotanquitsiquea tee-

quea nonquempejiguempaji imaica,

⁷ manaquea inchiquiojiquea nonetsanajiaque-
mpiquea noquempetacaajiaquempi chaajaniqui-
tirajaca oguimoncajiguirigueti iriniro.

⁸ Caavijiquea nopintsamajajiaquempi,
jeroquea teequea aparo nonintajigue
nontsavetantaquempiro Quenquetsatsarentsi
Oganejencatatsica itigarancaquea Aapani
Irioshi, quempecaquea nometojaventajiaque-
mpo, teetari nontsaroacaguemparoji iroorijite
nopintsamajajiaquempi.

⁹ Napitsaroventarijate, picocanicajate
piquenquejajajiro quero nocojiaca naatimpajia:
nantajiaquequea nomagotimentajiaqueroquea
nosheca. Noquejejiaqueroquea imaica
savincaguiteriqui aisa pitsecariqui aatonijite
natsipetacaajiguimpi aviatimpajia pojocashiji-
aquarenamegueti intati arinijite nontsavetan-
timojiaquempironijite Quenquetsatsarentsi
Oganejencatatsica itigarancaquea Aapani
Irioshi.

¹⁰ Aviatimpajia tsaroventajigarica Aapani
Irioshi pamenajiaquenaquea nochoocat-
timojiaquempigueti, aisa Aapani Irioshi
yamenajiaquenaquea, nocomajamajajiaca
teequea noncovaeguishetempaji. Aisa
nonetsanamajajiaqueroquea maasanopae
icantaguetaquea Aapani Irioshi cameetsanijite
iramenajiaquenijite teequea taaca opajita
nompeacaimatemppaji covaeguisherentsi.

¹¹ Aisa pitsajiaquequea nocantajiaquempiquea
arimpaquea pintsaroventamajajianaquempari
Aapani Irioshi, jero aisa noguishinejajiaquempi

noquempetacaajiaquempiquea aviguentijiaca
nirijanijiate.

¹² Notsatacaamajajiaquempiquea nocanta-majajiaquempi queroquea pincojianaquempani pincomajamajajianaquempanijite cameetsanijite irishineventajiaquempinijite Aapani Irioshi. Iriotaquequea cantatsica iroaqueragueta ininque-quea pintsipajiaquempari impeaqueempagueti Imajirojiate maasano, iramenajiaquerigueta maasanojia yoganejencamajata.

¹³ Nocantacoguitaniquea nocantajiaqueri Aapani Irioshi noshinevaetacaquea, name-najiaquequea notsavetantimojiaquempigueti Iguenquetsatsare piquemisantajiavaqueroquea pishineventajavacaroquea, pamena jiaqueterite teequea iro iguenquetsatsare caquinte, pitsajiaavaqueroquea iroguenti Iguenquetsatsare Aapani Irioshi, arimajatarite irootaquequea. Irootaque cantashitatijianaquempica aviatimpajia quemisantajianaqueroca, agavejacaajianaquempi.

¹⁴ Napitsaroventarijiate, oraquea coramaniqui icatsimamajajianaquempigueti pigonoropae yatsipetacaajiaquempigueti manatarite iquejetacaajiaquempiquea tsaroventajigarica Quirishito Jesoshi choocajati sica Joreaqui capiocaventapiniji-garica Aapani Irioshi. Aritarite iquejetacaajiacari igonorojia iriatimpajia joriojia, mana quea yatsipetacaajiacari.

¹⁵ Iriatimpajia joriojia metojacaantajiaquerica Amajirote Jesoshi iquejetacaajiaqueriquea imetojajiaquerigueta coramani tsavetantajiatsica. Ari iquejejiaquenaquea naatimpajia,

icatsimamajajiaquenaquea, yoguisotojaiaquena. Teequea irinetsanateroji inintacaquerica Aapani Irioshi, icatsimamajiaqueriquea aisa maasanopae caquinte,

¹⁶ aritarite inintajiavecaquea irojocaavaque-name yamenaqueenagueti nonintajiaque nontsatacayaqueri teeca irijorijoigueji cameetsanijite irimeshiajitaquerinijite. Iquejejiacagueti imaica, icovaeguishemajajiaca, irootaquetari aapojaca imaica, icatsimamajajiaqueriquea Aapani Irioshi.

*Inintavecaquea Paavoro irinejajajaterime
Tesaronicaquitica*

¹⁷ Napitsaroventarijate, coramaniquea nojocajianaquempigueti oraniqui Tesaronicaqui teetarite namenajavetajempiji, cotanquitsiquea noccani noquenquejajiaquempi, teetarite nompeacojiguempiji. Imaica nonintamajajiavecaqueate namenajajatempime.

¹⁸ Iroshivecaquea noncoraquejiaquemequea, naatimpa Paavoro nonintamajapinivetaca noncoraquetaquequea, cotanquitsiquea teequea nagatejajigueji, yojocaavaquenatarite Satanashi.

¹⁹ Cotanquitsiquea imaica noninquequea noncantajiaquempi taa ipajita noguijamajatavaje naatimpajia. Iriguentiquea noguijamajatavaje incoraquetajategueti Amajirote Jesoquirishito, oncoramanitapoja jegueti nontsipatsipaitanaquempi noncantajiaqueri: “Jeeri irirajia notsarоventacaajiacaca.” ¿Quericaquea shinетacaajiaquenaneca? ¿Quericaquea noshineventamajataquempaca

oncoramanitapoajegueti? Aviguentijiaquea noshineventajiaquempa.

²⁰ Arimajacaquea aviguentijiaquea shinetaaa-jiaquenaneca, aisa aviguentijia noshineventama-jiaquempa.

3

¹ Coramaniquea nopintsapintsajavetaca cotanquitsiquea namenajiaquequea tee-quea nagavejajigueji noncoraquejigueji, noquenquetsatavacaajiacaquea, iroompaquea nocantajiaqueri irioqueate oananquitsine Timoteo, naatimpajia choocajiajatsine Atenashiqui.

² Iroompaquea notigarancaqueriquea Timoteo iramenajajatempiquea. Iriguentiquea apitsaroventarite antaquenerica Aapani Irioshi, iriguenti notsipatashijiacaca notsavetantaquerogueti Quenquetsatsarentsi Oganejencatatsica tsavetacotaquerica Quirishito. Namenajiaquequea iragavejaque intsatataamajajiaquempiroquea, aisa intampishitacaajiaquempi

³ aatonijite quericaca ovashiantirotsi itsaroventamajatarigueti iramenaquegueti yatsipetacaajitacarigueti, inintacaacajitari Aapani Irioshi antsipeventajiaquempari Quirishito.

⁴ Oraquea nochoocatimojiaquitimpigueti nocantajiaquempiquea: “Ariquea irantsipeta-cajaicaji.” Imaica pitsajiaque onetsanatanaca.

⁵ Nonintamajataquequea nonquemaco-majajiaquempi, notigarancantacaricaquea

Timoteo iramenajiaquitempi picantacoguitanica pitsaroventamajatanacariea Quirishito. Notsaroacaanaquempiquea noquenquejaque arica yamatavijajiaquempi ampatsini nintatsica incovaeguishetacaante. Aricaja manacajate noquenquetsatimojiavetaqueempiquea intati.

⁶ Imaicaquea coraquetajiquea Timoteo yamenajiajatimpi icamantajiaapoajajanaquea arimpaquea pitsaroventamajajianacari, aisa pipintsatantajianaca. Icamantajiaquenaquea piquenquejajianaquenaquea pinintamajajiaque pamenajiajena piquejejiaquena naatimpajia nonintamajajiaquequea namenajiajatempi.

⁷ Natsipevajejiaquea taaca opajita, aisa yatsipetacaajiaquenaquea itsipa caquinte, cotanquitsiquea poguishinejamajataquenaquea, napitsaroventarijate, noquemacojiaquempigueti arimpaquea pitsaroventamajajianacariea Amajirote Quirishito.

⁸ Arimajacaquea noshinemajajianajaquea, noquemacojiaquempitari picoguitaniquea pitsaroventamajaguitarini teequea povashiantajeriji.

⁹ Jeroquea namananaquerigueti Aapani Irioshi nogaamajatanacaquea noshinemajatanaca oshequi teequea nontsajigueji querocaquea noncantajigue, caavijitari yoguishinejajianaquena namenjiaquempigueti pitsaroventamajajianacari.

¹⁰ Oavaetanaquequea savincaguiteri aisa pitsecariqui namanajiaqueriquea Aapani Irioshi nocantajiaqueri nonintajiaquequea namenjiajatempi nontsatacaamajajiaquitempiro tequerataca pintsamajajigueji.

11 Nonintajiaquequea irojocaconoven-tavaquena Aapani Iriosk aisa Amajirote Jesoquirishito nagavejajiaqueniji noncoraque-jiaquitequea namenajiajatempi.

12 Aisa nonintajiaquequea iragavejacaajiaque-mpi Amajirote arimpaniji pimpintsamajatava-cajianaquempa, aisa arimpaquea pimpintsama-jianaquempari maasano caquinte, pinquempe-jiaquenaquea naatimpajia nopintsamajajiaque-mpigueti aviatimpajia.

13 Ariquea pinquejejianaquempaquea imaica cameetsanijite intampishitacaimenquempinijite Aapani Iriosk pishirequi aatonijite pipeacajaiga covaeguisherentsi manaquea pincomajajianaquempaquea. Oncoramanitapo-jajeguetiquea incoraquetajegueti Amajirote Jesoshi intsipatsipaitaquemparigueti maasano igomajamajarejia, iramenajiaquemriquea Aapani Iriosk netsanamajajiaquemriquea.

4

Queroquea incojitaquempani iroguishinejajita-queriniji Aapani Iriosk

1 Napitsaroventarijiate, coramaniqui notsata-cajajaquemriquea queroquea pincojiaquempani pincomajajiaquempagueti cameetsanijite pishinetacaajiaquempariniji Aapani Iriosk, ariquea piquemisantamajajianaquenaquea nocantajiaquempica. Imaica noncantsijajempriquea arimpaquea pinquejejianaquempa imaica, iriguentequea cantanquitsi Amajirote Jesoshi.

² Pitsajiaquerotari notsatacayaquempica ican-tacaquenaca Amajirote Jesoshi.

³ Ininquequea Aapani Irioshi pincomajamaja-jiaquempaquea. Aatoquea poashijiguiro man-quigarentsi teeca irooqua pashiquea piman-quigare. Ariquea pinquejejiaquempaquea man-quigarentsijia aatoquea poashijiguiritsi itsipa shirampari teeca irionica pashiquea manquigajigu-impica.

⁴ Iriraquea shiramparijia noninque intsajiaque cameetsataquequea irimanquigajiaquempa manquigarentsi, cotanquitsiquea netsanaquea iroajiaquero irimanquigajiaquemparogueti.

⁵ Aatoquea iquejejigaritsi irirajia teeca intsaroventajiguempariji Aapani Irioshi, opeacojianaqueriquea itsaniore yoashijiaqueroquea manquigarentsijia intati.

⁶ Aisa teequea oncamenteji pincantatsata-cotsijigueri pigonoro. Nocantajiaquempiquea coramaniqui, cotanquitsiquea imainaquea noncantsijajempiquea aisa, incatsimamajajiaqueriquea Amajirote maasano quempejiguiroca imaina.

⁷ Teetarite irooqua incajemimentacajiquea Aapani Irioshi cameetsanijite ancoquempaniquea ampeacaaguitemparoni taaca opajitapae covaeguisherentsi. Iroguentiquea incajemimentajiacajiquea ancomajamajajiaquempiji antajiaqueroquea cameetsaripae.

⁸ Nocantantajiaquempicaquea, quericacaquea teeca irininteji inquemisantajigueroji ocatica not-satacayaquempica tee naroguentijia irimaninteji, iriguenti imanintaque Aapani Irioshi tigaran-

caquerica Ishire inchoocashirentajiaquempi.

⁹ Notsataquequea Aapani Irioshi itsatacaaaji-aquempiroquea pimpintsatavacaamajajiaquempaquea. Irootaquequea imaica aatoquea notion-cajiguimpi noncantajiajempiroquea aisa.

¹⁰ Aritarite piquejejiacaquea imaica pipintsajiacariquea maasano papitsaroven-tarijiate choocajatiacsica guinteninintsipaequi Maseroniaqui, cotanquitsiquea nonintaquequea arimpaquea pimpitsamajajianaquempariquea.

¹¹⁻¹² Cameetsaquea pinchoocajianaquequea. Iroguentiquea pisavicaventamajajianaquequea pashipae pantajiaqueca. Inchiquiojitaquea pincatsiquetimojajempaquea aviatimpajia irooca otsipa panteca, aatoquea pasereantajiguitsi, manaquea pinquempetacaajiguem-paroquea nocantajiaquempica cameetsanijite aatonijite ishirontimentajiguimpi itsipa teeca intsaroventempariji, aisa cameetsanijite onchoocatimenquenijite taaca opajitapae picoguitejacojiacaca.

Quero oncotanaquempani oncoramanitapoja-jegueti incoraquetajategueti Amajirote

¹³ Napitsaroventarijiate, nonintajiaquequea pintsajiaque querocaquea incojianaquempani oncoramanitapoja-jegueti metojajianquitsica cameetsanijite aatonijite pishimampojancajiga piquempejigaritsija itsipa teeca intsajigueji intancoretancoreitanaje.

¹⁴ Aatimpajia atsajiaquequea imetojavetaca Jessoji, ariquea ipochatanaji. Aisa atsajiaquequea ariquea inquempetacaajiaquempariquea Aapani

Irioshi irivochajiajeriquea maasano tsaroventajiacarica metojajavetanquitsica cameetsanijite iramamirincajiajeri oncoramanitapoja jegueti incoraquetajategueti Jesoshi.

¹⁵ Itsatacayaquenaquea Amajirote notsatan-tajiacaca, aatimpajia tequerataca quea ametojajigueji incoraquetajategueti iriatimpa aatoquea aro jivajiguiri metojajianquitsica.

¹⁶ Ariquea iraguijipoje Amajirote, incantajiacaji iririjencani, ariquea inquejetsitempa irashivantite anaamajatanquitsica iririjencani incanquempa, aisa intivojiqueroquea itivore Aapani Irioshi. Iriquetiquea tancoretancoreitanajatsine metojajavetanquitsica aventajiacaca Quirishito.

¹⁷ Coajicaquea aatimpajia tequerataca ametojajigueji anconoajianaquempari iriatimpajia metojajavetanquitsica oahoaitanaquequea mararoqui antonquivojiavaquempari Amajirote jenoqui, ancoguitempaniquea antsipamajatajempari iriatimpa.

¹⁸ Irootaquequea noncantantajiaquempica imaica pinquenquejavacaajiaquemparoja ocatica poguishinejavacaajiaquempanijite.

5

¹ Imaicaquea, napitsaroventarijiate, tee pin-coacotajempaji nontioncaquempi noncamantajiaquempi quero incarate catsirincaiteri aisa quero oncarate savincaguiteri onetsanatantanaquempaca ocapae.

² Pitsajiaquetari oratica savincaguite ri inco-raquetantajempaca Amajirote manatarite incatimapoja(jem)paquea inquempetapo(jem)pari ait-sitantatsica icoraquetigueti pitsecariqui.

³ Incantajiavequempagueti maasano: “Imaicaquea cameetsavaequequea achoocajiaque, aatoquea taaca opajita oajiaji”, incatimajiaqueriquea incatsimamajajiaqueriquea Aapani Irioshi irantsipetacaajiaquempaci, querocampate iroaroaitanaqueni. Manaquea onquejetaquemparoquea oncantaguetanajerogueti manquigarentsi, ocatimapojiro oquemavaquero ocantaguetanajiroguedi, queroquea oncoquempani.

⁴ Cotanquitsiquea aviatimpajia, napitsaroven-tarijiate, teetarite pinquempejiguempariji teeca intsaroventajiguempariji, teequea pimpitsecashirentaco(jigue)ji. Aatoja ari iquejetacaajiguimpiquea iriatimpajia oncoramanitapo(jem)pari incatimapo(jem)pari.

⁵ Aviatimpajia quempetaca pitsirencashirentaco(jiaque), pisavincaguite shirentaco(jiaque), jeroquea poguijantajiajavajemparica incoraque-tajategueti, teetarite pinquempejiguempariji covaeguisherijia pitsecashirentaco(ji)atsica.

⁶ Iriatimpajia teequea inquenquejeroji incora-quetantajempaca Amajirote, quempevetacaquea mana imaajiaque. Cotanquitsiquea aatoquea aquempejigaritsi iriatimpajia. Jaamejate agama-jaguemparini anquenquejamajajigue.

⁷ Iriraquea maajianquitsica iroguentiquea imaajiaque pitsecariqui. Ariquea iquempe-jiacaquea aisa shinquijianquitsica iroguenti

ishinqui jiaca pitsecari qui.

⁸ Cotanquitsiquea aatimpajia mana asavinca-guitetacojiaquequea atsaroven tajiacaritarite Amajirote, jeroquea jamejate anquenqueja-majajiana quequea. Oncoraquetashicajigueti covaeguishetagantsi jeroquea anticaanqueemparoca: aventajiaqueemparie a Amajirote, aisa ampintsatavaca amajajiana queempaquea, irooca quea aisa aguijaguiteniquea aapojajempagueti savincaguiteri oahoaitanta queempaca jenoqui inquitequi antsipajiaqueemparie Jeso quirishito meshiajia ca jica.

⁹ Teetarite incanteji Aapani Irioshi ininque incatsimajiacaji, manaquea icanque ininque quea irimeshiajia ca jica aventajiaqueemparigueti Amajirote Jeso quirishito aatonijite oahoaititsi camorecariqui.

¹⁰ Iriatimpa imetojave ntajiacajiquea cameetsanijite ancoquempaniquea antsipajiaqueemparie, arica quea choocatatsitirajajigueti oncoramanitapo jaje gueti incoraquetantajempaca, arica quea ametojajia que.

¹¹ Jeroquea nocantanta jiaquempica poguishine java ca jiaquempaquea, aisa pintampishi tava ca jiaquempaja, aritarite picojiaca piquempe jia quer oquea imaica.

Icamantajiaqueri quero incojiaquempani

¹² Imaica quea, napitsaroventarijiate, noninque quea pinquemisanta jiaqueriquea irirajia intacajia queca Aapani Irioshi intsatac妖ia quempi aisa intampishi taca jiaquempa pinetsana-majajia quer oniji icanqueca Amajirote.

13 Icoguitaniquea isavicaventamajajiaquero itsatacaaajaquempica, irootaquequea nocantantajiaquempica pishineventamajajiaquemparija pimpintsamajajiaquemparija. Aisa noninquequea pintsipatavacaajiaquempagueti pinchoocajiaquequea cameetsa.

14 Jero aisa, napitsaroventarijate, nonintajiaquequea pincantomajajiaqueriquea perojiatsica, pintampishitacajiguerija tsarontijia aisa teeca intampishitashijigueroji taaca opajita coraquetashijiaquerica, pantsiperejacojiaquemparoja querocaca incoquempani maasano.

15 Querocaca incojiaquempini papitsaroventarijate aatoquea pipigajigari, manaquea pincavintsajitempariquea maasano.

16 Pincoquempanija pishinejiaquempaja.

17 Pincoquempaniquea pamanajiaqueri Aapani Irioshi.

18 Aricaquea pinchoocajiaque cameetsa, arica pantsipevaequempa, cotanquitsiquea pincoquempaniquea pishineventamajataquempari Aapani Irioshi, pincanqueriquea: "Ariotesaa", irootaquequea ininqueca iriatimpa, aviguentijiatari tsaroventajigarica Quirishito Jesoshi.

19 Aatoquea pisanteregiri Ishire Aapani Irioshi.

20 Aisa aatoquea pimanintajiguiro icanqueca tsavetantajiguiroca icanquerica Aapani Irioshi.

21 Cotanquitsiquea iroquetiquea pinquemisan-tajiavaqueriquea itsatacaaajaquempica, iroompa

pamenajiaquegueti tampatica yoquero, ariquea pinquemisantsijiguempariquea.

²² Oraquea maasano covaeguisherentsi aatoquea piquenquejajiguirotsi, aatoja pipeacagarotsi.

²³ Iriraquea Aapani Irioshi irioquea choocatacaajiacajica cameetsa aatonijite ashoshoguiteta. Imaicaquea noninque intampishitacaajiaquempiquea cameetsanijite pinquenquejamajaquerinijite iriatimpa, aisa pisavicaventamajaqueronijite maasanopae intaguequeca. Noninquequea inquempoguijamajajiaquempiroquea pishire, piguenquejane, pitsino, maasano, cameetsanijite incoraquetapojajegueti Amajirote Jesoquirishito iramenajiapojaempiquea netsanamajajiaquempi.

²⁴ Iriraquea cajemajiaquempica icancaniquea inetsanamajaquero maasano icanqueca, ari irinetsanaqueroquea maasano ocatica.

²⁵ Imaicaquea, napitsaroventarijiate, noninquequea pamanacoventajiaquenaja.

²⁶ Netsana pinintavorojiavaqueri* maasano apitsaroventarijiate.

²⁷ Ocaticaquea paperi notioncajiaquempica noninquequea pampatsajavantajiaquenerija maasano papitsaroventarijiate choocajatsica oraniqui, iriguentiquea nintanquitsica Amajirote.

* ^{5:26} **Netsana pinintavorojiavaqueri.** Yamejiaca coramani inintavorotavacaajiajavaca yamenavacaajiacagueti, ari iquejejiaca tsaroventajigarica Quirishito coramani.

28 Namanacoventajiaquempiquea maasano incavintsajimentajiaquempinijite Amajirote Jeso quirishito.

**Iroaquerari Itioncacaantaqueca Aapani
Irioshi: Tsavetacoquerica Amajirote
Jesoquirishito**

New Testament in Caquinte (PE:cot:Caquinte)

copyright © 2008 Wycliffe Bible Translators, Inc.

Language: (Caquinte)

Translation by: Wycliffe Bible Translators, Inc.

Caquinte[cot], Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Caquinte

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-12-21

PDF generated using Haiola and XeLaTeX on 18 Apr 2025 from source files
dated 29 Jan 2022

a31aed44-e5b1-5420-8e3c-ccef224c4988